



Tavla d'informaziun.




Il commentari da Viola, Lisa e Thomas: «Cura turnainsa puspè?»

FOTOS C. CADRUVI E V. PFEIFFER

En l'aria e sut terra – ina excursiun da brutt'aura

DA CLAUDIA CADRUVI / ANR

■ Tgi che visita il Wildmannisloch po giudair gist duas attraccziuns: La «Selun Bahn» ed in cuvel che animescha la fantasia. Ina redactura da l'anr è sa messa sin viadi cun ses trais uffants:



«Tgi va a spass en da quest'aura?» ma dumond'jau enten charar atras il Toggenburg: «Probabel n'è la pendiculara gnanca averta.» Ma arrivà a Starkenbach a la staziun da la pendiculara, stos jau constatar che nus n'essan betg ils sulets sturnichels che fan excursiuns. Anc quatter autras famiglias ed in um pensiunà spetgan da pudair ir sin l'Alp Selun. Probabel vulan tuts visitar il Wildmannisloch.

Ina «mega coola» chista

Mes uffants n'èn betg gists stads inchantads da bandunar la stiva chauda. Ma uss èn els tuttenina da buna luna. «Mega cool», hai num cura ch'els vesan la «chista cun tetg» cun la quala nus vegnin transportads sin l'alp.

Persunter hai jau tuttenina dubis: «Sa sch'jau n'avess betg forsà duì prender la ruta Alt St. Johann–Alp Selamatt. Là hai ina pendiculara pli moderna?» Mia fi-

glia gronda ma quietescha: «Ti sas seser en la pendiculara e serrar ils eglis. Jau fatsch schon las fotografias per la gasetta.»

I fiss bel d'esser in asen

Sulet quatter personas dastgan seser en la pendiculara. Perquai stuain nus spetgar. Finalmain vegnin nus vidlonder. Ils uffants prendan plaz sco sch'i sa tractass d'ina girundella en l'Europapark. Jau vom en sco davosa. La dunna che vanda bigliets serra las portas. «Na ston ins betg serrar questas portas cun clav?» dumond jau. «Naba», di la dunna che fa era tuttas manipulaziuns tecnicas per il manschi da la pendiculara.

Entant ch'jau controllesch anc quanta paisa che l'esch da la «chista» po star ora, parta la pendiculara. Nus essan già en ils auts. «Mamma, guarda giu là hai dus asens sper il parcadi», di mia figlia pitschna e sa stenda lunsch ord la chista. Igl è l'emprima giada en mia vita ch'jau fiss pli gugent in asen che pasclass sper in parcadi.

Tranter Sântis e Churfirsten

«Luftseilbahn» è il dretg pled. Ins ha aria detgavunda. Sch'ìls nivels dauzan mintgatant in'ala, ves'ins schizunt che la vista atras il Toggenburg fiss magnifica. Ma il massiv dal Sântis, che sa chatta visavi, è zuglià en ina tschajera stinada che na tschessa gnanca zitg.

Ils mussavias sin l'Alp Selun van en tuttas direzziuns. Davent da qua cuntanschiss ins en duas u trais uras il Selun, il Brisi ed il Frümself – trais pizs che tutgan tar ils Churfirsten. Ma oz n'èsi betg aura per ir a culm. Nus sa mettain sin via vers il Wildmannisloch. Gnanca mes'ura e nus essan già là.

Betg emblidar: stivals e cazzola!

Igl è ina tauna sco bleras, ma ina gronda ch'ins po dapertut star sidretg. Il terren è carpus, i dagutta ed è glischnus. Quai na fa tut nagut, nus avain gea buns chalzers e giaccas. Ma tuppamain è la tauna era profunda e stgira. E nus n'avain naginas cazzolas! Suentar ventg meters è noss'exploraziun già a fin, nus stuain turnar a l'entrada.

Perclertg èn anc auters turists da questas varts, da quels pli perderts ch'èn equipads cun avunda cazzolas. Mes uffants dastgan ir cun in'autra famiglia en

il profund da la tauna. I va forsà ventg minutas fin ch'els turnan.

«Co èsi stà?» dumond'jau. «Mega crass. Ma nus n'essan betg stads fin entadim. Per ir pli lunsch duvrassan nus stivals.» «Guarda mamma, tge crap ch'jau hai chattà. Quai era segir in guaffen dals Neandertalers.» «Neve, nus vegnin puspè ina giada qua? Cun stivals e cazzolas per mintgin!»

L'excursiun è para grategiada.

Avdants avant 40 000 onns

A l'entrada da la tauna leginsa las tavlas d'informaziun: Avant 40 000 onns han umans da Neandertal avdà en il Wildmannisloch. En la tauna han ins exchavà ina fuaina e guaffens da crap. Plinavant han ins chattà ossa dad urs, da liuns, lufs e vulps.

Las emprimas perscrutaziuns en il Wildmannisloch ha Emil Bächler fatg il 1906. Il 1923 ha il perscrutader cumen-

zà cun examinaziuns pli detagliadas da la tauna.

Il Wildmannisloch è sin 1628 m s. m. La tauna ha ina lunghezza da 150 meters ed ina differenza d'autezza da 2,4 meters.

Dumondas e maletgs

Avant turnar a chasa datti anc ina ovomaltina en l'ustaria «Zum Wilden Mannli». La tauna ha ispirà nosa fantasia. Nus s'imaginain co' i pudess esser stà en il temp dals cuvels.

Sa, sch'igl era fraid l'enviern en la tauna? Sa, sch'ìls Neandertalers savevan già tschantschar? Sa, quant vegls che quests umans vegnevan insumma? En ils chaus da mintgin sa furman maletgs dals avdants dal Wildmannisloch. Quels maletgs purtain nus cun nus a chasa.

L'um pailus

Dal Wildmannisloch datti bleras ditgas e legendas. Ina istorgia è dentant vaira: La stad 1844 han pasturs da l'Alp Selun fastisà ch'inginas vatgas devan pauc latg. Els han decidi da star guardia. Ina notg ha in paster engartà ina creatira che s'avischinava nà dal Wildmannisloch. I n'era betg pussaivel da vesair, sch'igl era in carstgaun u in animal. La creatira è sa fatga vitiers ed ha cumenzà a tittar l'iver d'ina vatga. Cura ch'ella ha gi avunda è ella puspè s'allontanada.

L'autra notg èn plirs pasturs stads a lajtg. La creatira è turnada e leva puspè s'avischinar ad ina vatga. En quel mument han ils pasturs piglià ella. Igl era senza dubi in carstgaun. Ma tge carstgaun? El era niv e l'entir corp era pailus. El è sa dustà sc'in morder.

L'auter di han ins purtà el ad Alt St. Johann. Ins ha empruvà da trair en vestgadira ad el. Plain ravgia ha el stgarpà si tut. El pudeva avair tranter sedesch e ventg onns. Cun il temp è el sa quietà. Igl è stà pussaivel da tegnair el en chasa. Ma el n'ha per vita duranta mai empenndi da discurre, el è s'exprimi sco ils animals. El ha obtegnì il num Johannes Seluner.

La gronda part da sia vita ha el vivì en la chasa da povers a Nesslau. Remartgablas èn cunzunt las istorgias d'in nobel e misterius um che ha visità pliras giadas Johannes Seluner. Il 1898 è Seluner mort. 28 onns pli tard ha in professer d'antropologia exumà sia bara per intercurir, sche l'ossa da Seluner haja caracteristicas d'in Neandertaler. Ma il professer ha chattà sulet ossa normala.

Per il personal d'alp e per turists

La «Selun Bahn» è vegnida bajegiada il 1911 per transportar material si d'alp. Dapi la renovaziun il 1953 vegnan era transportadas personas. Peter Bösch, il president da l'Alp Selun, di che la pendiculara fetschia mintga stad 3500 viadis. La pendiculara vegnia duvrada dal personal d'alp. Grazia als turists, per ils quals la pendiculara è in'attracziun spe-

ziala, possian ins mantegnair quest'infrastructura ed investir ad onn radund 35 000 francs. La confederaziun controllescha mintg'onn la segirtad da la pendiculara.

L'enviern è la pendiculara serrada. Dapli infurmaziuns datti sut 079 537 77 20 ni tar www.wildmannli.ch.



La vista vers il Toggenburg sura. Il Sântis sa zuglià en nivels.



La damaun eran chautschas e chalzers anc Schubers.



Sa sch'in Neandertaler ha ina giada gi enta maun quest crap?



Entadim la tauna vegni pli stretg.



«Mamma, guarda giu là igl asen.» Ma la mamma na vul betg guardar en la profundità.